

INATSISARTUT

PARLIAMENT OF GREENLAND



Inatsisartut Siulittaasuannit
Josef Motzfeldtimit
NUTAARSIASSAT
Nutaarsiassat
Ukiup affaa kingulleq 2012

Aallaqqaasiut

Qinigaaffimmi matumani Inatsisartut suliffiisa ukiuisa sisamaat ukiakkut ataatsimiinnerup 21. september ammarneqarneratigut aallartippoq. Ataatsimiinneq 7. december naammassivoq. Ukiakkut ataatsimiinneq naammassineqarpoq suliassanut angisuunut inatsisip akuersissutigineqarneratigut. Inatsit taanna Namminersorneq pillugu inatsisip kingorna inatsisitut nutaatut pingarnerpaatut ilaatigut taaneqarpoq. Inatsit nunatsinnit avataaniillu tusagassiorfinnit annertuumik soqutigineqarpoq, taamatullu aamma oqalliseqqinnissamut inuiaqatigiillu ineriaroqqinnissamut periarfissaannut tunngavissaassalluni pingaarutilik.

Siulittaasoqarfiup UKA12-imik piareersaanera

Siulittaasoqarfiup 2012-imi ukiakkut ataatsimiinnissamut oqaluuserisassat tallimanngornermi 17. august 2012 siunner-suutnik tunniussivissap kingorna ulla arfineq-marluk qaangiutiinnartut saqqummiuppa. Nuannaarutissaavoq aammaarluni oqaluuserisassat taamatut siusitsigisukkut saqqummiunneqarsinnaammata, Inatsisartunut ilaasortat allaffeqarfiiillu ataatsimiinnerup aallartinnissaanut piareersarnissamut piffissaqarluartillugit.

UKA12-imut ilaasortat siunnersuutaat nutaat 57-it ilanngunneqarput, Naalakkersuisut immikkoortunik nutaanik 29-nik siunnersuuteqarlutik, taakkulu saniatigut immikkoortut 18-it siusinnerusukkut ataatsimiinnernit kinguartinneqarsi-manngikkunik siullermeerneqareersut aamma oqaluuserisassanngortinneqarlutik.

Pilarsaarutaagaluarpoq ukiakkut ataatsimiinneq 27. november naammassissasooq, kisiannili suliassat angisuut pillugit inatsisissatut siunnersuutip suliarineqarneranut sivisunerusumik piffissaqarnissaq noqqaassutigineqarmat ukiakkut ataatsimiinneq aatsaat 7. december naammassivoq, taamalu ilaasortat angerlarsinnaanngorlutik.



Attaveqaatitut ataatsimiitaliaq Igaliko aug. 2012

Siulittaasoqarfíup Folketingip siulittaasoqarfatalu akornanni attaveqaatitut ataatsimiítitaliami ataatsimiinneq

Inatsisartut Siulittaasoqarfiat Folketingillu siulittaasoqarfia ukiut tamaasa nunat paarlakaallugit attaveqaatitut ataatsimiítitaliami ataatsimiittarput. Ukioq manna ataatsimiinneq 27. – 30. august Kujataani ingerlanneqarpoq. Attaveqaatitut ataatsimiítitaliami inatsisartoqarnermi misilittakkanik paarlasseqartarpooq qlequttallu ataatsimut soqtigisat oqallisigineqartarlutik. Malunnarpoq ataatsimiittarnerni taakkunani piffissami kingullermi nunarput namminersortoq nutaaq assut oqallisigineqartartoq, pisunik kingullermik ilisimatinneqarnissartik folketingip siulittaasoqarfata assut soqtigisarlugu.



Islandip Præsidentia Inatsisartullu Siulittaasuat sept. 2012

Siulittaasup Islandip Præsidentia qinigaaq-qinnerani pilluaqquaa

Inatsisartut Siulittaasuat septembarimi periarfissaqarsimavoq Islandip Præsidentia maajimi suli ukiunut sisamanut qinigaaqqinneranik pilluaqqussallugu. Piffissaq tamanna iluatsillugu Inatsisartut Siulittaasuta Islandillu Præsidentiata issittumi nunani ataatsimut naalakersuinikkut soqtigisat oqallisigaat, minnerunngitsumik nunatta Islandillu tamakkunani suleqatigiinnerusinnaanerat eqqarsaatigalugu.

2014-imi Naalagaaffiit Peqatigiit nunat inoqqaavi pillugit ataatsimeersuartitsinissaanut piareersaataasumik Issittumi nunat inoqqaavisa Nuummi ataatsimiinneranni Siulittaasup peqataanera

Inatsisartut Siulittaasuat nunat inoqqaavi pillugit ataatsimeersuarnissamut issittumi nunat inoqqaavisa Nuummi Katu-ami ullni 23. aamma 24. oktober piareersaataasumik ataatsimiinnerannut peqataavoq. Issittumi nunanit arlalinnit nunat inoqqaavi peqataapput ilaatigut norgemi saamit inatsisartuisa siulittaasuat Egil Olli.



Saamit inatsisartuisa siulittaasuatu Inatsisartullu siulittaasuatu oktober 2012

Saamit inatsisartuisa siulittaasuannik naapeqateqarneq

Naalagaaffiit Peqatigiit ataatsimeersuartsinissaannut piareersaataasumik ataatsimiinnerat iluatsillugu Inatsisartut Siulittaasuata Saamit inatsisartuisa siulittaasuatu Egil Olli naapeqatigaa, taanna kissaateqarsimammat Inatsisartuni sulineq eqqarsaatigalugu ilisimateqatigiiusumik ataatsimeeqateqarnissamik. Saamit inatsisartuisa siulittaasuata piffissaq tamanna iluatsillugu Inatsisartut siulittaasoqarfiat qaaqqua norgemi saamit inatsisartuinut tikeraarnissaanut.

Nunat Avannarliit Killiit Siunnersuisoqatigiiifiata (NAKS) Savalimmiuni ukiumoortumik ataatsimiinnera

NAKS-ip ukiumoortumik ataatsimiinnera Savalimmiuni Gjøgvimi ulluni 3. - 7. september ingerlanneqarpoq. Nunatsinnit aallartitat Savalimmiunit angerlarnerminni Islandikkoorput, Reykjavimilu nunat avannarliit killiit ulluni 7. aamma 8. september kulturikkut ulloqartinneqarnerannut peqataallutik.



Nunat Avannarliit Killiit Siunnersuisoqatigiiivi Savalimmiuni sept 2012

NAKS-ip kaammattuutai

NAKS-ip ukumoortumik ataatsimiinnerminni kaammattuutit nutaat marluk akuera. Kaammattuutit nalinginnaasumit ikinnerupput nunat avannarliit suleqatigiinneranni piumasaqaatit nutaat tunngavigalugit. Kaammattuutit aappaanni naalakkersuisut kaammattorneqarput atuakkiornermik allannermillu pikkorissartarnernut periarfisseeqqullugit, aappaanilu naalakkersuisut kaammattorneqarlutik issittooq eqqarsaatigalugu nunat avannarliit killiit ataatsimut iliuuseqarsinnaanerannik nukittorsaaqqullugit. Kaammattuutit nutaat marluk Inatsisartunut 2013-imi upernaakkut ataatsimiinnermi oqaluuserisassangortinneqassapput.

Kaammattuutit Inatsisartunut aalajangiiffigisassatut siunnersuutitut saqqummiunneqartarput, naak siunnersuutit assi-giinngitsut imarisaannik isumaginninnissamik Naalakkersuisunut kaammattutaaginnaraluarlutik. Taamaalillutik kaammattuutit pituttuineq ajorput.

Piffissamut sept2012/sept2013 NAKS-imi nunatta siulitaasuuffimmik tigusinera

Qinigaaffimmi matumani aappassaa NAKS-imi siulittaasuneq ataatsimeersuarnermi nunatta tiguua. Taamaalilluni nunarput tullianik ukumoortumik ataatsimiinnissamut 2013-imi Igalikumi ulluni 26. - 30. august ingerlanneqartussamut qaaqquisuussaaq.

Islandimi nunat avannarliit kulturikkut ulloqartinneqarnerat

NAKS-ip ukumoortumik ataatsimiinnerannut nangissutitut 7. - 8. september Reykjavikimi nunat avannarliit killiit kulturikkut ulloqartinneqarput. Tamanna iluatsillugu nunat avannarliit killiit suleqatigiinnerat pillugu atuakkiaq saqqummiunneqarpoq: Naboer i Nordatlanten (Atlantikup avannaani sanilerit). Atuagaq NAKS-ip kissaateqarneratigut 2002-miili suliaralugu aallartinneqarsimavoq. Kulturikkut ulloqarttisinermi taamatuttaaq NAKS-ip meeqyanut iniusuttunullu atuakkiornermik nersornaasiuttagaa 2012 tunniunneqarportaaq, kalaaleq atuakkiorloq Lars-Pele Berthelsen atuakkiaminut „Kaassalimik oqaluttuaq“ nersornaaserneqarluni.



Inatsisartut Siulittaasuut Kultureqarnermullu Naalakkersuisoq nov. 2012

Kulturikkut ulloqartitsisarnerup nunatsinnut ingerlateqqinnejarnera

NAKS-imut siulittaasutut NAKS sinnerlugu siulittaasup kulturikkut ulloqartitsinissaq Kultureqarnermut Naalakkersi-sumut Mimi Karlsenimut ingerlateqqippaa, taamalu tullianik nunarput taamatut aaqqissuussisussanngorluni. Taamalu maanna nunatsinnit aalajangerneqassaaq sumi kulturikkut malunnartitsiniartoqassanersoq sunillu pisoqassanersoq. Nunat avannarliit killit ataatsimut kulturikkut ulloqartinneqartarnerat NAKS-imut 2008-imut kaammattuut, nunanit pingasunit tamanit ilalerneqartoq, tunngavigalugu pisarpoq.

Asiap kangiani nunat aallartitaannik Siulittaasup naapeqateqartarneri

Ukiaq manna Inatsisartut Siulittaasuat asiap kangiani nunat aallartitaannik arlalinnik naapeqateqarpoq, taamaalilluni Kinap, Koreap Kujalliuup, Australiap Singaporellu aallartitaat naapeqatigineqarlutik. Asiap kangiani nunanit assigiinngits-unit arlalissuarnit tikeraarteqarnerup ersersippaa nunanit taakkunanga nunarput issittorlu qanoq naalakkersuinikkut soqutigineqartigisut. Aallartitanik naapeqateqartarnerit takutippaat tamarmik immikkut aatsitassarsiorneq taakkunin-ngalu piaasinnaaneq soqutigigaat nunatsinnillu sukumiinerusumik suleqatigiinnissamut isumaqatigiissuteqartarnissaq kissaatigalugu.

2012-imi ukiakkut ataatsimiinneq kisitsisinngorlugu

2012-imi ukiakkut ataatsimiinneq 21. september aallartippooq 7. december naammassilluni.

Ullut ataatsimiiffiit (nal. ak. oqalliffiit):			
		2009	
	28	UKA	
2010		2010	
UPA	16	22	UKA
2011		2011	
UPA	18	27 (nal. ak. 135)	UKA
2012		2012	
UPA	22 (nal. ak. 130)	30 (nal. ak. 156)	UKA

2012-imi ukiakkut ataatsimiinnermi ullut 30-it ataatsimiiffiupput. Qulaani takussutissiami qinigaaffimmi matumani ataatsimiinnerni allani ullut ataatsimiiffiusut, taamatullu aamma 2011-mi ukiakkut ataatsimiinnermiit naatsorsueriaaseq nutaaq malillugu isumaqatigiinniarnernut nalunaaqtutakunneri atorneqarsimasut takuneqarsinnaallutik.

UKA12-ip ingerlanerani akunnerit naalakkersuisunik apersuiffiit arfineq-pingasuupput UKA11-mi arfineq-marluullutik.

UKA12-ip ingerlanerani siulittaasoqarfik 14-eriarluni ataatsimiippoq UKA11-mi 20-eriarluni ataatsimiittoqartoq.

Siulittaasoqarfip Nersornaasiisarneri

Siulittaasoqarfik 2012-ip affaani kingullermi sölviusumik marlunnik Nersornaasiivoq, taamaalillunilu 2012 tamaat sisamanik sölviusunik Nersornaasiisoqarluni.

Taamaalilluni 2012-imi Nersornaatit sölviusut pingajuat Jens Sallingimut tunniunneqarpoq. Nersornaasiineq 15. august Qeqertarsuarmi ingerlanneqarpoq Inatsisartut Siulittaasuata nallittorsiualaartitsinerani.



Inatsisartut Siulittaasuat, Jens Salling nulialu.

Nersornaatit sölviusut sisamaat Islandimi Reykjavikimi Gerth Larsenimut tunniunneqarpoq. Nersornaasiineq 8. september pivoq Islandimi inatsisartut Althingip ilassinnittarfiini Inatsisartut Siulittaasuata nalliuottorsualaartitsinerani. Althingip siulittaasuata immikkut pisumut matumunnga init ilassinninnernut atortakkatik atugassiissutigisimavai.



Inatsisartut Siulittaasuat, Gerth Larsen nulialu.

Upernaakkut Ataatsimiinneq 2013 (UPA13)

Inatsisartut upernaakkut ataatsimiinnerat tallimanngornermi 8. marts 2013 aallartissaaq. Upernaakkut ataatsimiinnis-samut Inatsisartunut ilaasortat Naalakkersuisullu siunnersuutinik oqaluuseritikkusutaminnek tunniussivissaat tassaavoq 1. februar 2013 nal. 12.00. Inatsisartut Allattoqarfiannit siunnersorneqarniaraanni tamanna pissaaq tunniussivissaq kingusinnarpaaamik sapaatit akunnerinik marlunnik sioqqullugu.

Inuuusuttut Inatsisartui 2013

Inuuusuttut Inatsisartuinik taallugit aaqqissuussisarnerit eqqarsaatigalugit periaatsimik nutaamik Siulittaasoqarfik aallartitsimavoq. Nutaamik aaqqissuussinermi meeqqat atuarfianni klassit angajulliit aallaaviussapput, sapinngisamillu nunatta immikkoortuinit tamanut peqataatisisoqarniarluni. Peqataasussanik toqqartuineq naammassereerpoq, taakkulu Inuuusuttut Inatsisartuinik taallugu aaqqissuussinermut ulluni 22. – 24. februar 2013 ingerlanneqartussamut peqataassallutik.

Inuuusuttut Inatsisartui eqqarsaatigalugit immikkut nittartagiorloqarsimavoq: www.inu.gl.

2012-imi ukiup affaanut kingullermut siulittaasumit nutaarsiassat
aamma www.inatsisartut.gl-imi atuarneqarsinnaapput.